

RI XOKOQ'A'

**RUSAMAJIB'AL TIJONEL
RUCHOLB'AL WUJ**

Tz'ib'anel: María Alicia Telón
B'anöy Wachib'äl: Margarita Ramírez

Universidad Rafael Landívar
Instituto de Lingüística / PRODIPMA
Guatemala, 1992



RI XOKOQ'A'

**RUSAMAJIB'AL TIJONEL
RUCHOLB'AL WUJ**

Tz'ib'anel: María Alicia Telón
B'anöy Wachib'äl: Margarita Ramírez

Universidad Rafael Landívar
Instituto de Lingüística / PRODIPMA
Guatemala, 1992

Colección:	Materiales Educativos No. 23
Serie:	Kaqchikel. área de Lenguaje, No. 7
Directora de la Colección:	Guillermina Herrera Peña
Editor:	Ernesto Loukota Soler
Autora:	María Alicia Telón
Ilustraciones:	Margarita Ramírez
Diagramador:	Carlos Rafael Figueroa
Correctores de Estilos:	Martín Chacach
	Rolando Chacach

© Universidad Rafael Landívar.

RUTZIJOB'AL WUJ

Re wuj re' rub'ini'an RUSAMAJIB'AL TIJONEL roma xtik'atzin chi re ri tijonel richin xtusamajij ri wuj rub'ini'an RI XOKOQ'A', re wuj re' tz'ib'an kichin xtaq ak'wala' e koköj, e ch'uti'n. Chupan ri wuj RI XOKOQ'A' e k'o pach'un taq tzij, e k'o ojer taq tzijonik; ri RUSAMAJIB'AL TIJONEL xa jun tob'äl richin yek'ut ye'etamäx re tzij re'.

Chupan re wuj RUSAMAJIB'AL TIJONEL xtik'il ri tijonela' achike rub'anikil xtikik'wa'j ri jujun tzijonik. Yalan k'atzinel chi ri ak'wal nikikot ta, taq nib'erila' ri ramaj richin nutz'et nusik'ij ri ruwuj; nab'ey xa kan xa xe tirak'axaj ri sik'inik nub'än ri tijonel, wi nurayij tuchapa' rija' ri sik'inik, jeb'el tiq'ax chi ruwäch, tib'e'apon pa ruwi' janipe' ri nutz'et nusik'ij chi ruwäch ri ruwuj, tusolo' rij ri jujun k'ayewal yeril, tutzijo' janipe' ri nikoje' kan pa ruwi', kerukusaj ri k'ayew taq tzij yeretamaj, kan kerub'ana' ri utziläj taq tzij yeretamaj, man kerumestaj janipe' ri ch'ab'äl e retaman.

RE RUSAMAJIB'AL TIJONEL ruk'wa'n ri RURAYB'ÄL TIJONIK, RI RUB'EYAL TIJONIK, RI RETAL ETAMANIK, chuqa' ruk'wa'n pa ko'öl ri ruwachib'äl ri ruxaq wuj akuchi' k'o wi ri tzijonik k'atzinel chi nisamajix.

Ütz ta ri' xtik'atzin ta chi re ri tijonel re jun wuj re', richin ri ak'wal xtikikot ta chi rij ronojel ri xtik'ut chi ruwäch, man ta xtumestaj xtumalij ri qach'ab'äl ri qak'aslen röj kaqchikeli' winaqi', xtub'än ta pa ruk'aslen ronojel ri utziläj taq b'anob'äl.

Janíla matyox chi re ri q'atb'äl tzij richin ri tinamit Holanda, janíla matyox chi re ri nimaläj molaj taq tinamit kib'ini'an Naciones Unidas; koma rije' xsamajix re wuj re'.

RURAYB'ÄL TIJONĪK

Tiretamaj ri ak'wal
achike nik'atzin wi
nunik'oj rij ri wuj.



RIJ RI WUJ

RETAL ETAMANĪK

Xretamaj ri ak'wal
nunik'oj rij ri wuj,
jeb'el xretamaj
achike nik'atzin wi
rij ri wuj.

RUB'EYAL TIJONĪK.

Tab'ij rat tijonel chi ke ri ak'wala' chi tikinik'oj RIJ RI WUJ. Nab'ey tikitz'eta' ri ruwäch k'a ri' tikitz'eta' ri chi rij.

Ke'ato' chi rub'ixik achike e k'o chi ruwäch ri wuj, wi rije' man kan ta yetik'r nikib'ij ronojel:
jun kumätz
jun ka'i' tz'ib'

Tasolo' chi kiwäch achike nikib'ij ri tz'ib':
RI XOKOQ'A', ja ri' rub'i' ri wuj.
Juan Yool Gómez, ja ri' rub'i' ri achin xtz'ib'an re wuj re'.
Margarita Ramírez, ja ri' rub'i' ri xtän xnuk'un re wuj, chuqa' xerub'an ri achib'äl.
Universidad Rafael Landívar.
Instituto de Lingüística, ja ri' ri nimaläj tijob'äl jay akuchi' xsamajix wi re wuj re'.

Tak'utuj chi ke ri ak'wala' achike nik'atzin wi RIJ RI WUJ, ke'awak'axaj, tatz'aqatsaj ri kitziy wi k'atzinel.
RIJ RI WUJ nik'atzin richin chi niqetamaj:
Rub'i' ri wuj.
Achike winäq xtz'ib'an.

Achike winäq xnuk'un, xcholajin ri samaj.
Achike winäq xb'anun ri achib'äl.
Akuchi' xsamajix wi ri wuj.

Tak'utuj chi ke achike rub'i' ri wuj, ke'ato' wi man yetik'r ta nikitzolij ri atzij. Tab'ij chi ke chi qonojel k'o qab'i', tab'ij ri ab'i' rat chi ke k'a ri' tikib'ij kib'i' rije' chi kijujunal; ke re' tab'ij rat chuqa' rije'.

Y'in nub'i'.

RI XOKOQ'A'. Tasolo' chi kiwäch.

Tak'utuj chi ke achike ruq'ajarik, achike nuya' chi tzij rub'i' ri wuj; wi man yetik'r ta nikib'ij, ke'ato'.
Tasik'ij ka'i' b'ey chi kiwäch ri tzijonik tz'ib'an pa waqi' rukak'al rajlab'al ruxaq wuj rub'ini'an RI KUMÄTZ RIK'IN RI XOKOQ'A'. Tasolo' chi kiwäch.

Tikinik'oj ronojel ri kiwuj, k'a ri' tak'utuj chi ke achike je' xek'il chupan; tatz'aqatsaj ri kitziy wi k'atzinel.

E k'o:
tzijonik

ojer taq tzij
pach'un taq tzij
chikopi'
che'
kotch'i'j
q'ayis

Tak'utuj achike e k'o chi rij ri wuj.

Rujey ri kumätz

Tzib'

Tasik'ij chi kiwäch achike nikib'ij ri tz'ib', achike
nikiq'ajuj chuqa'.

Tab'ij chi ke chi man tikimestaj achike nik'atzin wi
nikinik'oj RI RI RI WUJ. Jun ka'i' ak'wala' tikikamuluj
achike nik'atzin wi, takamuluj chuqa' rat chi kiwäch
richin nik'oje' kan pa kiwi', nich'ike' kan pa kijolon.

RURAYB'ÄL TIJONĪK

Tiretamaj ri ak'wal
achike nik'atzin
wi ri nab'ey ruxaq
wuj.



RUXAQ WUJ • (1)

RETAL ETAMANĪK

Jeb'el xretamaj ri
ak'wal achike
nik'atzin wi ri
nab'ey ruxaq wuj.

RUB'EYAL TIJONĪK

Tab'ij chi ke ri ak'wala' chi tikijaqa' ri kiwuj pa
nab'ey ruxaq, tasik'ij ka'i' mul chi kiwäch ronojel ri
nub'ij chi ruwäch ri ruxaq wuj.

Tab'ana' re jun ka'i' kutunĭk re' chi ke:

— ¿Achike rub'i' re wuj re'?
— *RI XOKOQ'A', rub'i' re wuj re'.*

— ¿Achike nuya' chi tzij rub'i' re wuj re'?
— *Ja ri jun jeb'el ok mama' setesik jux ni
k'oje' chi kaj taq k'o mismil jöb', rusumal
jöb', taq k'o chuqa' q'ij, wuqu' rub'onil,
achi'el rub'anun rub'onil ri kumätz k'o chi
rij re wuj re'.*

— ¿Achike qawinaq xtz'ib'an re wuj re'?
— *Jun achin rub'ini'an Juan Yool Gómez
ri qawinaq xtz'ib'an ri wuj re'.*

— ¿Achike winäq xb'anun ri achib'äl?
— *Jun xtän rub'ini'an Margarita Ramírez
xb'anun ri achib'äl.*

— ¿Akuchi' xsamajĭx wi re wuj re'?
— *Pa Instituto de Lingüística richin ri
nimaläj tijob'äl jay rub'ini'an Universidad
Rafael Landívar, xsamajĭx wi re wuj re'.*

— ¿Achike tinamüt xb'an wi re wuj re'?
— *Pa nimaläj tinamüt xb'an wi re wuj re'.*

— ¿Achike juna' xb'an re wuj re'?
— *Chupan ri juna' 1,991 xb'an re wuj
re'.*

Tikijunumaj ri nab'ey ruxaq wuj rik'in ri RIJ WUJ.
Tikinik'oj achike ri junan nub'ij, achike ri man junan
ta. Tikitz'eta' chi xa xe ri ruk'isib'äl cholaj tzij man
k'o ta chi ruwäch RIJ RI WUJ, akuchi' nub'ij wi:
Ri nimaläj tinamüt Guatemala akuchi' xb'an
wi re wuj re'.

Ri juna' 1,991 taq xb'anatäj re wuj re'.

Tak'utuj chi ke achike nik'atzin wi ri nab'ey ruxaq
wuj, ke'ato' wi man yetikür ta nikitzolij ri atzij.
Ri nab'ey ruxaq wuj nik'atzin richin chi niqetamaj:

Rub'i' ri wuj.

Rub'i' ri winäq xtz'ib'an ri wuj.

Rub'i' ri winäq xb'anun ri achib'al chupan ri wuj.


Rub'i' ri jay xsamajix wi ri wuj.

Rub'i' ri tinamit xb'an wi ri wuj.

Ri juna' xb'anatäj ri wuj.

Chi kijujunal tikisik'ij rub'i' ri wuj, ka'i b'ey.

Tiretamaj ri
ak'wal achike
nik'atzin wi ri
ruka'n ruxaq
wuj.



Jeb'el xretamaj ri
ak'wal achike
nik'atzin wi ri
ruka'n ruxaq wuj.

•• (2)

Tab'ij chi ke ri ak'wala' chi tikijaja' ri kiwuj pa
ruka'n ruxaq, tasik'ij ka'i' b'ey chi kiwäch ronojel ri
nub'ij chi ruwäch ri ruxaq wuj. Tasolo' chi kiwäch
ronojel ri nub'ij:

Nab'ey mul xelesäx re wuj re': pa juna' 1990.
Ruka'n mul xelesäx re wuj re': pa juna' 1991.

Molaj wuj: Ojer taq tzijonik richin Guatemala, wuqu' railab'al.

Tanaj wuj: Kaqchikel, ka'i' rajlab'al.

Ri k'amöl b'ey pa ruwi' ri samaj: Ya
Guillermina Herrera Peña.

Ri uk'wayon rucholajen ri samaj: Ma Moris Polanco Barrera.

Ri xmolon-ri samaj: Ma juan Yool Gómez.
Ri xnik'on xchojmirisan ri tz'ib': Ma Martín
Chacach Cutzal.

Ri xnuk'un ri samaj, xb'anun ri achib'äl: Xta Margarita Ramirez.

Ri juna' xb'an ri samaj: Pa 1991, pa nimaläj

tijobäl jay Universidad Rafael
Landívar, pa nimaläj tinamit Guatemala.

Tak'utuj chi ke chi kijujunal achike nik'atzin wi ri
ruka'n ruxaq wuj. Tab'ana' jujun k'utunik chi rij ri
k'a ri, tasolo' qa chi kiwäch.

Tatz'ib'aj chi ruwäch jun nim wuj ri rub'i' ri molaj wuj chuqa' ri rub'i' re wuj re'. Ke'aq'olij, ke'ab'ajij chi ruwäch jun xan pa tijob'al jay akuchi' ye'atijoj wi.ri ak'wala'. Ke ri' chuqa' tab'ana' chi ke ri kib'i' ri jujun tzijonik nisik'ij q'ij q'ij, ri e tz'ib'an chupan re wuj re'.

Ke re' tab'ana' chi re:

"OJER TAQ TZIJONĪK RICHIN GUATEMALA"

"RI XOKOQ'A"

RURAYB'ÄL TIJONĪK

Tiretamaj ri
ak'wai achike e
tz'ib'an chupan
re wuj chuqa'
achike yek'atzin
wi.

Rat ak'wal, rat xäin, rat ala:

Rik'in ronojel qakikoten niqaya' re xti wuj re' pan
aq'o.

Re xti wuj re' nutzijo k'iy xtaq kitzij kan ri qati't
qamama', it yalan e jeb'el ak; roma k'a ri niqaja' chi rat
chuqa' nawetamaj ta.

Tasik'ij chi jujun re xtaq tzi re', xa yalan na wi
xkakikot xawetamaj: ja k'a taq xawetamaj niqaja' chi tatzij
kik'in ri xtaq awachib'il, kik'in ri ate' atata' xa ke ri k'a chuqa'
nje' yalan xkakikot xikinataj ri kitzij ri qati't qamama'.

Ronojel re xtaq tzi re', jun chi ke ri sipanik k'ay'on
kan ri qate' qatata', roma k'a ri' man niqaja' ta niqametaj,
xa ruk'amun chi niqasamaj chuqa' niqanimirsaj ruk'ojen.

Rik'in ruk'hak re xtaq tzi re' nawetamaj chi ri
qach'ab'äl man k'ayew ta rutz'ib'axik, xa roma k'a ri' k'atzinel
chi rat xkakikot xtaq tzi, xkakikot xtaq tzi ronojel ri nalax
pan awänima, ronojel ri anajib'äl ke ri niqaya' ruq'i, chuqa'
ruk'asik ri qach'ab'äl.

Taq rat xawetamaj xkakikot ruk'wach wuj chuqa'
xawetamaj xkakikot, qonojel xkakikot awik'in.

Ja ta ri Ajaw xtuipaj ri arayb'äl.

RUXAQ WUJ

... (3)

RUB'EYAL TIJONĪK

Tasik'ij ka'i' b'ey chi kiwäch ri ak'wala' ronojel ri
tziy tz'ib'an chi ruwäch ri rox ruxaq wuj, rije' xa xe
tikak'axaj.

Tasolo' chi kiwäch janipe' tz'ib'an chi ruwäch re ruxaq
wuj re', k'a ri' tab'ana' jun ka'i' k'utunik chi rij; ke'ato'
ri ak'wala' wi k'atzinel:

— ¿Achike nutzijo re xti wuj re'?

— *K'iy kitzijon kan ri qati't qamama'.*

— ¿Achike najowäch chi iwe taq xtiwetamaj
ri kitzij ri qati't qamama' tz'ib'an chi ruwäch
re wuj re'?

— *Chi xtiqatzijoj ta chi ke ri qachib'il, chi
ke ri qate' qatata'.*

— ¿Achike ruk'amon chi niqab'än kik'in ri
kitzij qati't qamama'?

— *Chi niqasamajij chuqa' niqanimirsaj
ruk'ojen.*

— ¿Achike nawetamaj rik'in rusik'ixik re
xtaq tziy re'?

— *Chi ri qach'ab'äl man k'ayew ta
rutz'ib'axik.*

— ¿Achike ruq'ij taq xtiqetamaj xtiqasik'ij
ruwäch wuj?

— *Chuqa' xtiqetamaj xkojtz'ib'an.*

Tikinik'oj ronojel ri kiwuj, tikitz'eta' akuchi' k'o wi ri
rajlab'al ri jujun ruxaq wuj; tikajlaj chi kijujunal ri
ruxaq wuj, ke'ato' ri ak'wala' wi k'atzinel.

1	jun
2	ka'i'
3	oxi'
4	kaji'
5	wo'o'
6	waqi'
7	wuqu'
8	waqxaqi'

9 b'eleje'
 10 lajuj
 11 julajuj
 12 kab'lajuj
 13 oxlajuj
 14 kajlajuj
 15 wo'lajuj
 16 waqlajuj
 17 wuqlajuj
 18 waqxaqlajuj
 19 b'elejlajuj
 20 juk'al
 21 jun rukak'al
 22 ka'i' rukak'al
 23 oxi' rukak'al
 24 kaji' rukak'al
 25 wo'o' rukak'al
 26 waqi' rukak'al
 27 wuqu' rukak'al
 28 waqxaqi' rukak'al
 29 b'eleje' rukak'al
 30 lajuj rukak'al
 31 julajuj rukak'al
 32 kab'lajuj rukak'al
 33 oxlajuj rukak'al

34 kajlajuj rukak'al
 35 wo'lajuj rukak'al
 36 waqlajuj rukak'al
 37 wuqlajuj rukak'al
 38 waqxaqlajuj rukak'al
 39 b'elejlajuj rukak'al
 40 jukak'al
 41 jun roxk'al
 42 ka'i' roxk'al
 43 oxi' roxk'al
 44 kaji' roxk'al

Tikijaqa' ri kiwuj pa ka'i' rukak'al (42) rajlab'al ruxaq wuj, tikitz'eta' chi chi ri' k'o wi ri:

Kisolb'al k'ayew taq tzij.

Tasolo' chi kiwäch achike rukusaxik re'.


Tikijaqa' ri kiwuj pa kawinäq kaji' (44) rajlab'al ruxaq wuj, tikitz'eta' chi chi ri' k'o wi ri:

Rucholajen re taq tzij.

Tasolo' chi kiwäch achike nik'atzin wi re', tasik'ij ronojel ri tz'ib'an chi ruwäch re ruxaq wuj re'. K'a ri' tikib'ij achoq chi rij xtitzijon wi re wuj re', rat xa xe ke'awak'axaj; tab'ij chi ke chi ronojel q'ij xtikak'axaj, xtikisik'ij, xtikitziyoj chi kijujunal ri tzij tz'ib'an chi ruwäch re wuj re'.

RURAYB'ÄL TIJONĪK

Jeb'el tirak'axaj ri
ak'wal ri tzij
nisik'ix chi
ruwäch. Tiq'ax
chi ruwäch
janipe' nub'ij re
tzijonik.



Ri ti b'ixanel xi'l

Ri xi'l jeb'el ok
ri rub'ix.
ti xi'l jeb'el ok
ri ruqöl.
Rijo' nib'ixan
chi pa q'ij
chi chaq'a'.
stape' man tz'etel ta.

Xob'akuchi' xkob'e wi,
pa taq che',
pa taq q'oyis,
pa taq awän,
pa taq ilko'n;
ronojel mul
xtawak'axaj
rub'ix ri ti xi'l.

Ri xi'l k'aqo'j rij,
ri xi'l saqsöj rij,
ri xi'l q'eqq'öj rij.

RUXAQ WUJ

(5)

RETAL ETAMANĪK

Jeb'el nirak'axaj ri
ak'wal ri tzij nisik'ix
chi ruwäch.
Nutzolij,
nukamuluj ri
ak'wal janipe' k'o
chupan ri tzijonik.

RUB'EYAL TIJONĪK.

Tikijaqa' ri ak'wala' ri kiwuj pa wo'o' rajlab'al ruxaq
wuj. Tak'utuj rat tijonel chi ke, achike yekitz'et chi
ruwäch ri ruxaq wuj; ke'ato' wi k'atzinel:

Ri rub'i' ri tzijonik, "Ri xti b'ixanel xi'l".

Ronojel ri tz'ib' ruk'wa'n ri tzijonik.

K'iy q'ayis.

Jun xti xi'l.

Tak'utuj chi ke achoq chi rij kami xtib'ech'o'n wi re
tzijonik re'; ke'ato' ri ak'wala' wi k'atzinel, konojel
ke'awak'axaj.

Tasik'ij chi kiwäch ka'i' b'ey ronojel ri tzijonik, rije'
xa xe tikak'axaj. Wakamin xa chöj tatziyoj chi ke,
kaji' chi ke rije' tikitzijoj chi kijujunal ri tzijonik
xasik'ij, xatzijoj rat.

Tasik'ij rub'i' ri tzijonik chi kiwäch, tikikamuluj rije'
ka'i' b'ey, tikiya' retal ri xti ch'ab'al XIL; k'a ri' tikiya'
retal re ch'ab'al re', janipe' mul, janipe' b'ey xtikil
chupan re tz'ib'anik. Rat tatzu' chi ja' ruchojmil
tikib'ana' chi re ri kisamaj.

Tab'ij jun ka'i' k'utunik chi ke, ke'ato' chi rutzolixik
taq man ketaman ta nikitzolij ri tzij.

—¿Achike rub'i' ri xti chiköp nutzijoj ri
tzijonik?

—*Rub'ini'an Xi'l ri xti chiköp nutzijoj ri
tzijonik.*

—¿Janipe' nib'ixan ri xti xi'l?

—*Nib'ixan ri xti xi'l chi pa q'ij chi chaq'a'.*

—¿Akuchi' niqak'axaj wi rub'ix ri xti xi'l?

—*Niqak'axaj rub'ix ri xti xi'l, pa taq che',
pa taq q'ayis, pa taq awän, pa taq tiko'n.*

—¿Achike titzu'n rij ri xti xi'l?

—*Nitzu'un k'aqo'j, saqsöj, q'eqq'öj rij ri
xti xi'l.*

Tab'ij chi ke chi tikinik'oj jeb'el jeb'el ri xti xi'l, k'a
ri' tak'utuj ja re' chi ke:

—¿Janipe' rujolon, janipe' ruwi' ri xti xi'l?
—*Xa jun rujolon, xa jun ruwi' ri xti xi'l.*

—¿Janipe' ajolon, janipe' awi' rat?
—*Xa jun nujolon, xa jun nuwi' yin.*

—¿Janipe' raqän ri xti xi'l?
—*Waqi' raqän ri xti xi'l.*

—¿Janipe' awaqän rat?
—*Xa ka'i' waqän yin.*

—¿Janipe' ruxik' ri xti xi'l?
—*Ka'i' ruxik' ri xti xi'l.*

—¿Janipe' axik' rat?
—*Manäq nuxik', xa xe ka'i' nuq'a'.*

—¿Janipe' ruk'a' ri xti xi'l?
—*Ka'i' ruk'a' ri xti xi'l.*

— ¿Janipe' awuk'a' rat?
— *Manäq wuk'a' ta yin.*

Chi re ruwi' kiq'a' tikib'ana' ri ajlab'al nikib'ij, chuqa' tikichapa' ri xti kich'akul taq nikib'ij ronojel re', nab'ey rat k'a ri' rije':

Ri xti xi'l
jun rujolon
ka'i' ruk'a'
ka'i' ruxik'
waqi' raqän.

yin:
jun nujolon
ka'i' nuq'a'
ka'i' waqän
manäq wuk'a'

Tikiya' raq'omal ri achib'al e k'o chi ruwäch ri ruxaq wuj: räx, q'än, k'aqo'j.

RURAYB'ÄL TIJONÏK

Jeb'el tirak'axaj
ri ak'wal ri tzij
nisik'ix chi
ruwäch. Tiq'ax
chi ruwäch
janipe' nub'ij ri
tzijonik.



RUXAQ WUJ

— / — (6 - 7)

RETAL ETAMANÏK

Jeb'el nirak'axaj ri
ak'wal ri tzij nisik'ix
chi ruwäch.
Nukamuluj,
nutzolij ri ak'wal
janipe' k'o
chupan ri tzijonik.

RUB'EYAL TINONÏK

Tikijaqa' ri ak'wala' ri kiwuj pa waqi' rajlab'al ruxaq
wuj. Tak'utuj chi ke, achike yekitz'et chi ruwäch ri
ruxaq wuj; ke'ato' ri ak'wala' wi k'atzinel:

jun nim che'
ka'i' umül
oxi' ajxik' chikopi'
kaji' palamax
jun kumätz
kablajuj xtaq kotz'ij
k'iy xtaq q'ayis
ri rub'i' ri tzijonik, "Ri loq'oläj che' "
ronojel ri tz'ib' ruk'wa'n ri tzijonik.

Tak'utuj chi ke achoq chi rij kami xtib'ech'o'n wi re
tzijonik re'; ke'ato' ri ak'wala' wi k'atzinel, konojel
ke'awak'axaj.

Nib'ech'o'n chi rij ri loq'oläj che'.

Nib'ech'o'n chii rij ri ...

Tasik'ij chi kiwäch ka'i' b'ey ronojel ri tzijonik, rije'
xa xę tikak'axaj. K'a ri' xa chöj tatzijoj chi ke; ka'i'
chi ke rije' tikitizijoj chi kijujunal ri tzijonik xasik'ij,
xatzijoj rat.

Tasik'ij rub'i' ri tzijonik chi kiwäch, tikikamuluj rije'
ka'i' b'ey, tikiya' ketal ri ka'i' ch'ab'äl loq'oläj che'.
Tasik'ij ronojel ri tzijonik chi kiwäch, tikitzeqej rije'
ri kiq'a' taq nikak'axaj ri ka'i' ch'ab'äl loq'oläj che',
k'a ri' tikiya' ketal re ch'ab'äl re' janipe' mul xtikil
chupan re tz'ib'anik. Rat tatz'eta' chi ja' ruchojmil
tikib'ana' chi re ri kisamaj.

Tab'ij re jujun k'utunik re' chi ke, ke'ato' ri ak'wala'
wi k'atzinel.

— ¿Achike nuya', nusipaj ri loq'oläj che'
chi qe qonojel, nub'ij ri wuj?

— *Nuya', nusipaj ri loq'oläj che' chi qe
qonojel:*

*ri qachoch
ri qasok*

ri qameq'enal
ri qaq'aq
ri kikoten

— ¿Akuchi' je' k'o wi ri loq'oläj che', nub'ij
 ri wuj?

— *K'o ri loq'oläj che':*

Pa juyu'
pa tinamit
pa taq jay

— ¿Achike chik juley nuya' nusipaj ri
 loq'oläj che' chi qe qonojel, nab'ij rat?

— *Nuya' nusipaj ri loq'oläj che' chi qe*
qonojel:

ri ruwäch
ri qasi'
ri qaq'om
ri ...

— ¿Akuchi' chik je' k'o wi ri loq'oläj che',
 nab'ij rat?

— *Chuqa' k'o ri loq'oläj che':*

pa siwan
pa b'ey
pa k'echelaj
pa ...


Jeb'el tikitzu' ri nim che' k'o chi ruwäch ri
 kiwuj, tiketamaj tikik'utu' chi ri loq'oläj che'
 k'o:

raqän
ruq'a'
ruxaq

Ri ruxe' ri che' tikib'ana' ri ak'wala'. Tikib'onij ri
 loq'oläj che': räx, raxröj, k'aqoj.

RURAYB'ÄL TIJONĪK

Tiretamaj
kiwäch ri ak'wal
janipe' ri e k'o
chi kaj, chuqa'
achike yek'atzin
wi. Tikikot ri
ak'wal taq
nirak'axaj jun
tzijonik.



RUXAQ WUJ

... / ... (8 - 9)

RUB'EYAL TIJONĪK

Tab'ij, tasolo' kij chi kiwäch ri ak'wala', re kaji' tzij
re', tawila':

Ik' ik' naläx
niqab'ij qati't chi re
xa xe tokoq'a'
nusaqirisaj ri qab'ey.
RI IK'

Yarumeq q'ij q'ij
yeruchaqirisaj atzyaq
yeruk'iytisaj awawän
nusipajruch'ab'q'ijq'ij.
RI CH'UMIL

Nuya' muj
nuya' jöb'
jantäq säq säq
achi'el b'o'j.

RI SUTZ'.

Yalan e k'iy
e k'o chi kaj
yalan nej
e k'o wi
yech'ich'an tokoq'a'.
RI TAQ'CH'UMIL

Tikijaqa' ri ak'wala' ri kiwuj pa waqxaqi' rajlab'al
ruxaq wuj. Tak'utuj chi ke, achike yekitz'et chi
ruwäch ri ruxaq wuj; ke'ato' chi rub'ixik:

Rub'i' ri tzijonik, "Ri q'ij xk'ule'".

RETAL ETAMANĪK

Nub'ij ri ak'wal
kib'i' ri janipe' e
k'o chi kaj, chuqa'
janipe' yek'atzin
wi. Ri ak'wal
nikikot taq
nirak'axaj ri
tzijonik.

jun q'ij
jun ik'; jun kati't
waqi' sutz'
e k'iy ch'umil

Tasik'ij rat tijonel chi kiwäch ri ak'wala' ka'i' b'ey
ronojel ri tzijonik, rije' xa xe tikak'axaj. Tikitzijoj ri
ak'wala' ri tzij xasik'ij qa chi kiwäch xa xe ri ak'wala'
nikajo' nikitizijoj.

Chi ruwäch ri kiwuj tikiya' retal ri ch'ab'al man niq'ax
ta chi kiwäch, ri man nib'e'apon ta pa kiwi'. Tikikanuj
ruq'ajarik chupan ri "kisolb'al k'ayew taq tzij" pa ka'i'
rukak'al (42) rajlab'al ruxaq wuj; wi man yekil ta
chi ri' tikik'utuj chi ke kati't kimama', kite' kitata'.
K'a ri', jeb'el tasolo' chi kiwäch ri jujun ch'ab'al
k'ayew chi ke rije'.

Tasik'ij jun b'ey chik chi kiwäch ri tzijonik, tutzijoj
jun ak'wal janipe' ri xk'oje' kan pa ruwi', janipe' ri
xuyik kan pa rujolon, tatz'aqatsaj rat wi k'atzinel.

Takamuluj ri kaji' tzij tawila' chi kiwäch, chuqa' tikikamuluj ri je'. K'a ri' tikiya' raq'omal ri achib'al e k'o pa kiwuj.

Tab'ij re jujun k'utunik re' chi ke:

—¿Achike xtzijon chi re ri ik' chi ri q'ij nirajo' nik'ule' rik'in?

—*Ja ri sutz'.*

—¿Achike ri xk'ule' rik'in ri q'ij?

—*Ja ri ik'.*

—¿Janipe' xk'ule' ri q'ij rik'in ri ik'?

—*Pa saq'ij*

—¿Achike kib'i' ri xtaq kalk'wa'l?

—*Ch'umil.*

—¿Qitzij kami nub'ij re tzijonik re', chi ri q'ij xk'ule' rik'in ri ik'?

—*Qitzij nub'ij ...*

—*Man qitzij ta nub'ij ...*

Wi k'o jun ak'wal nirajo' nusik'ij ri ruwa wuj, tub'ana'.

RURAYB'ÄL TIJONĪK

Tiretamaj
kiwäch ri ak'wal
ri aj xik' chikopi'.
Tub'ij achike
nunük chi kij ri
tzij yerak'axaj.



RUXAQ WUJ
— / — (10 - 11)

RETAL ETAMANĪK

Nub'ij ri ak'wal
kib'i' ri aj xik'
chikopi' yerutz'et.
Nub'ij ri nunük chi
kij ri tzij yerak'axaj.

RUB'EYAL TIJONĪK

Tikijaqa' ri ak'wala' ri kiwuj pa waqxaqi' rajlab'al
ruxaq wuj. Tak'utuj rat tijonel chi ke, achike yekitz'et
chi ruwäch ri ruxaq wuj; ke'ato' chi rub'ixik:

jun che', ka'i' aj xik' chikopi': jun ch'ök, jun
xar; rub'i' ri tzijonik: "Taq ri xar xreleq'aj
rupawi' ri antun ch'ök.

Tasik'ij chi kiwäch ri ak'wala' ka'i' b'ey ronojel ri
tzijonik; nab'ey ronojel ri tzijonik; nab'ey mul yalan
eqal'; ruka'n mul, chanin.

Tab'ij jun ka'i' k'utunik chi ke, ke'ato' chi rutzolixik
taq man ketaman ta nikitziolij ri tzij.

—¿Achike kib'i' ri ka'i' xtaq aj xik' chikopi'
xetzijon chi kiwäch?

—*Ri jun antun ch'ök, ri jun xar.*

—¿Achike xeleq'an ri pawiaj?

—*Ja ri xar.*

—¿Achöj chi re xreleq'aj wi ri pawiaj?

—*Chi re ri antun ch'ök.*

—¿Ütz xub'än ri xar xreleq'aj ri pawiaj?

—*Manäq, man ütz ta.*

—¿Achike roma man ütz ta?

—*Roma xa xajan yateleq'.*

—¿Achike roma xajan yateleq'?

—*Roma ...*

Tatz'ib'aj xa xe jun nim tz'ib' chi ruwäch jun ruxaq
wuj, chi jujun ak'wal tiraq'omaj jun tz'ib'; ke'acholo'
ri tz'ib', ke'aq'olij ke'atz'omo' chi ruwäch xan ri ruxaq
taq wuj richin nib'ekib'ij pe re tzij re':

MAN ÜTZ TA NAB'ÄN ELEQ' ROMA XA
XAJAN



Tasik'ij ka'i' mul chi kiwäch ri ak'wala' ri nub'ij ri
tzij, k'a ri' tikikamuluj ri je' kaji' mul.

Tak'utuj chi ke ri ak'wala' wi kak'axan jun eleq'
b'anatajnäq ke täq ri', tikib'ij achike roma man üt
nikib'an eleq'. Tikinuku' chuqa' tikib'ij achike rejqalen
ri eleq'.

Wi k'o jun ak'wal nirajo' nusik'ij ri ruwa wuj, tub'ana'.

Chi ruwäch jun ruxaq wuj tikib'ana' ruwachib'al jun
chi ke ri ka'i' xtaq chikopi', tikitz'ib'aj ri rub'i' chi
ruxe' ri achib'al; k'a ri' tikiya' chi ruwäch xan pa
tijob'al jay, ri xar juk'an xan, ri antun ch'ök pa jun
chik xan.

RURAYB'ÄL TIJONÏK

Tuk'ama' runa'oj
ri ak'wal chi rij
jun tzijonik.
Tinaq'atsatäj ri
ak'wal chi re
jujun taq samaj
pa rachoch,
chuqa' pa
tijob'äl.



RUXAQ WUJ

☺ / ☺ (12 - 13)

RETAL ETAMANÏK

Xuk'än runa'oj ri
ak'wal chi rij ri
tzijonik. Jeb'el
yerub'än ri ak'wal
taq rusamaj pa
rachoch, chuqa'
pa tijob'äl.

RUB'EYAL TIJONÏK

Tak'utuj chi ke ri ak'wala' achike je' taq chikopi' e k'o chi
kachoch, achike kisamaj nikib'än. Ke'ato' chi rub'ixik:

Ri kej nireraj qasi'.
Ri mes, ri syan yerutäj taq ch'oy.
Ri mama', ... ¿Achike rusamaj nub'än ri mama'?
Ri ...

Tikijaqa' ri ak'wala' pa kab'lajuj rajlab'al ruxaq wuj.
Tasik'ij ri tzijonik ka'i' b'ey yalan eqal chi kiwäch, k'a ri'
ka'i' mul chanin, aninäq. Rije' xa xe tikak'axaj. Tab'ij re
jun ka'i' k'utunik chi ke, ke'ato' wi man ketaman ta
nikitzolij re tzij:

—¿Achike je' yerub'än ri mama'?
—*Nib'ixan, nixub'an, niroporot, nik'ason ri
mama'.*

—¿Achike rusamaj nub'än ri mama' ri nimaq'a'?
—*Nimaq'a' yan nik'ason ri mama'.*

Tikisik'ij ka'i' mul konojel ri ak'wala' pa jun b'ey, RI
K'ASONEL MAMA'.

Tak'utuj chi ke ri ak'wala' achike samaj yekib'än pa
kachoch, ke'ato' chi rub'ixik wi man ketaman ta nikitzolij
ri tzij.

Ri xtaq xtani' ützt ke re' nikib'ij:
yenk'asoj xtaq nuchaq'
yench'äj läq
yench'äj tzyäq
yimeson
ninpön wäy
yiloq'on

...

Ri xtaq alab'o' ützt ke re' nikib'ij:
yenk'asoj xtaq nuchaq'
yimeson
yiuyuq'un
yiloq'on

...

Tak'utuj achike samaj yetikür nikib'än pa tijob'äl Tikib'ij
rije' achike samaj yetikür nikib'än; tajacha' kisamaj pa



tijob'äl richin ronojel q'ij, ke'anaq'atsaj richin jeb'el nikib'än
ri jujun samaj, ützt re re':

yemeson

yetotan

yejoson

...

Tanik'oj ri kisamaj ronojel q'ij, tab'ij chi ke janipe' ri ützt
kib'anun chi re chuqa' janipe' ri man ützt ta kib'anun chi re.

Wi k'o jun ka'i' ak'wala' nikajo' nikisik'ij ri tzijonik,
tikib'ana'.

Tab'ij chi ke chi jeb'el tikitz'eta' tikinik'oj jun mama' pa
kachoch, pa k'ayb'äl; k'a ri', tikib'onij ri ruwachib'äl
inama' k'o chi ruwäch ri wuj.

RURAYB'ÄL TIJONĪK

Tuk'ama' runa'oj
ri ak'wal chi rij
jun tzijonĭk.
Tinaq'atsatäj ri
ak'wal chi re ri
samaj, ri nimäy
tzij, ri to'onĭk, ri
ajowab'äl.
Tiq'ax chi
ruwäch ri nusik'ij



RUXAQ WUJ

☰ / ☱ (14 - 15)

RUB'EYAL TIJONĪK

Tikijaqa' ri ak'wala' pa kajlajuj rajlab'al ruxaq wuj, tikib'ij
ronojel ri nikitz'et chi ruwäch ri ruxaq wuj, ke'ato' chi
rub'ixik:

Rub'i' ri pach'un tzij: "Ri ti samajel sanĭk";
kab'lajuj sanĭk;
jun xti juyu'.

Tasik'ij ka'i' mul ri tzijonĭk chi kiwäch ri ak'wala', wi e k'o
jujun ch'ab'äl ri man ketaman ta ruq'ajarik kekikanuj
chupan ri kisolb'al k'ayew taq tzij; wi man e k'o ta chi ri'
kekik'utuj chi ke kati't kimama', chi ke kite' kitata'.

Chi kijujunal ri ak'wala' tikisik'ij jujun molaj ch'ab'äl, k'a
ri' tab'ij re jujun k'utunĭk re' chi ke:

—¿Janipe' taq öj mitij röj?

—*Taq jukumaj, taq k'a loman yojyakatäj; taq
niqapararej ri qasamaj, taq ...*

—¿Janipe' taq niqajo' qĭ' röj?

—*Taq ...*

—¿Janipe' taq öj nimäy tzij röj?

—*Taq niqab'än ri nikib'ij qate' qatata', ri
qanimal, ri qatijonel; taq ...*

—¿Janipe' taq yalan yojkikot röj?

—*Taq nisipäx jun qamunil, taq ...*

Wi e k'o ak'wala' nikajo' nikisik'ij ronojel ri tzijonĭk,
tikib'ana'.

—Tab'ij chi ke chi achi'el nikib'än ri sanĭk nikito' ki' chi
rij jun samaj, ke ri' tikib'ana' rije'. Tacha' jun kisamaj
richin konojel nikib'än pa tijob'äl.

—Kekikanuj ri ch'ab'äl e k'o chupan ronojel ri tz'ib',
kekitzib'aj chi kijujunal.

o	j	n	i	m	ä	y	t	z	i	j	
j	j	j	j	l	l	a	e	w	l	i	n
m	a	s	e	b	a	c	l	m	e	p	a
i			a								
t			m								
i	m	e	t	z	a	e	m	p	i	k	l
j				y	o	j	k	i	k	o	t
				e	m	i	e	e	u	m	a
								l			
									a'		

RURAYB'ÄL TIJONÏK

Tich'o'n ri
ak'wal, tusiloj
ruq'a' raqän,
kerub'ana'
achib'äl richin
chi nub'ij janipe'
ri nunük, janipe'
ri nuna'.



RUXAQ WUJ

≡ / ≡ (16 - 17)

RUB'EYAL TIJONÏK

Tasik'ij rat tijonel ka'i' mul ri pach'un tzij k'o pa waqlajuj
rajlab'al ruxaq wuj chi kiwäch ri ak'wala'. Tikijaqa' ri
kiwuj, tikitz'eta' ronojel ri k'o chi ruwäch ri ruxaq wuj,
ke'ato' chi rub'ixik:

Rub'i' ri pach'un tzij: "Ri samajel sutz' ".
Ronojel ri tzij ruk'wa'n ri pach'un tzij.
Waqxaqi' sutz'.

Tikisik'ij konojel ri ak'wala' ka'i' mul ri pach'un tzij,
nab'ey yalan eqal rusik'ixik tikib'ana', k'a ri' chöj eqal; pa
rox mul aninäq, chanin. Wi k'o jun ak'wal nirajo' nusik'ij
ruyonil, tub'ana'.

Tikisiloj kaqän kiq'a' ri ak'wala', tikisiloj chi jun xti
ruch'akul achi'el ruk'amon yekib'an taq yekib'ij ri jujun
tzij e k'o chupan ri pach'un tzij, jeb'el tikib'ana' chi re ri
kiqül. Nab'ey, konojel junan tikib'ij ri pach'un tzij, k'a ri'
pa jujun cholaj ak'wala'. Wi k'o jun ak'wal nirajo' nub'ij
ruyonil ri pach'un tzij, tub'ana'.

Tikiya' kaq'omal ri jujun sutz': ka'i' säq, ka'i' raxwäch,
ka'i' chaj, jun q'eq.

Ke'awelesaj chi ruwa jay, kekitz'eta' ri sutz', tikib'ij

achike achib'äl yekitz'et chupan ri sutz'. K'a ri' tikib'ana'
kiwachib'äl ri sutz' xekitz'et.

Tikib'ij ri ak'wala' achike nik'atzin wi ri sutz' nub'ij ri wuj,
ke'ato' wi k'atzinel.
nuya' mujal
nuya' jöb'
nuya' raxq'ab'
nuya'aj ri qatiko'n
nuya'aj ri k'echelaj
nuya'aj ri raqän ya'

Tikib'ij ri ak'wala' achike chik jun nik'atzin wi ri sutz',
nikib'ij rije:
Ri sutz' ...

Tikitz'ib'aj jun tzij ri k'o chi nikil chi rij ri sutz', ke'ato' wi
k'atzinel. Tikisik'ij chi kiwäch ri kachib'il ri ilon tzij
xkitz'ib'aj.

Tikib'ana' ruwachib'äl kitiko'n kite' kitata', chuqa' tikib'ana'
ruwachib'äl janipe' ri xk'oje' kan pa kiwi', janipe' ri
xch'ike' kan pa kijolon pa ruwi' ri nub'ij ri tzijonik.

RETAL ETAMANÏK

Nub'ij ri ak'wal
janipe' ri nunük,
janipe' ri nunataj
nich'o'n, nusiloj
ruq'a' raqän,
yerub'an
achib'äl.

RURAYB'ÄL TIJONÏK

Kerunataj ri ak'wal
konojel ri ch'ab'äl
retaman chik
yerutz'et yerusik'ij
chi ruwäch wuj,
keretamaj kiwäch
ri k'ak'a' taq
ch'ab'äl chuqa'
keretamaj ri
ruq'ajarik.



RETAL ETAMANÏK

Retaman ri ak'wal
nutz'et nusik'ij ri
tzijonik, retaman
kiq'ajarik konojel ri
ch'ab'äl e k'o
chupan re
tzijonik.

RUXAQ WUJ

☰ / ☷ (18 - 19)

RUB'EYAL TIJONÏK

Tikimoyij kiwäch, tikitz'apej runaq' kiwäch, tab'ij chi ke
chi tikib'ana' chi yeb'eb'yaj pa juyu', tak'utuj chi ke achike
je' xtaq chikopi' yekitz'et pa kib'ey; tatz'ib'aj ronojel ri
kib'i' ri ri xtaq chiköp xtikib'ij, chi ruwäch ri tza'lem
tz'ib'ab'äl.

umül

tz'il

...

Tikisik'ij ronojel ri xatz'ib'aj rat chi ruwäch ri tz'alem
tz'ib'ab'äl. Tikib'ana' kiquil ri jujun chikopi' nasik'ij apo
rat chi kiwäch, wi manäq kich'ab'äl tikib'ana' ruwachib'äl
ri rub'anikil yesilon.

Tikib'ij kib'i' ri xtaq chikopi' e k'o pakachoch, rat tatz'ib'aj
ronojel chi ruwäch ri tz'alem tz'alem tz'ib'ab'äl, tikisik'ij
ronojel ri xatz'ib'aj rat. Tikib'ana' kiquil ri jujun chikopi'
nasik'ij apo chi kiwäch, wi manäq kich'ab'äl tikib'ana'
ruwachib'äl rub'anikil yesilon.

wakx

karne'l

Tasik'ij rat tijonel chi kiwäch ri ak'wala', ka'i' mul ri
pach'un tzij k'o pa waqxaqlajuj rajlab'al ruxaq wuj, rije'
xa xe tikak'axaj. K'a ri' tusik'ij jun ak'wal ka'i' b'ey chi
kiwäch konojel.

Tikijaqa' konojel ri ak'wala' ri kiwuj, tikitz'eta', tikisik'ij
chi kijujujal ri pach'un tzij. Kekiya' pa jun setesik
konojel ri ch'ab'äl man ketaman ta kiwäch, man ketaman
kiq'ajarik; k'a ri' kekitz'ib'aj chi kijujujal chi ruwäch ri
tz'alem tz'ib'ab'äl, rat tijonel jeb'el ke'asik'ij ke'asolo' ri
kiq'ajarik chi kiwäch ri ak'wala'.

Chi konojel pa jun b'ey tikisik'ij ka'i' mul ri tzijonik. Wi
k'o jun ak'wal nirajo' nusik'ij ruyonil, tub'ana'.

Tikiya' kib'i' konojel ri chikopi' e k'o chi ruwäch ri wuj,
wi man ketaman ta tikik'utuj chi ke kati't kimama', kite'
kitata'. Janipe' ri man xketikür ta, ke'ato' rat.

¿Achike nik'atzin wi xqasik'ij re tzijonik re?
*Richin niqetamaj chi, chi ruwäch ri
ruwach'ulew e k'o jalajöj taq chikopi'.* Chi pa
qatinamit man e k'o ta konojel ri e k'o chi
ruwäch ri qawuj ...

RURAYB'ÄL TIJONİK

Tiretamaj ri
ak'wal achike
kejqalen ri
tzijonik yerusik'ij,
tiretamaj niril
ruxe'el ri tzijonik.



Ri t'üq nikikot

Ri t'üq nikikot ri rónima
roma yeb'os ye'aläx yan
ri taq ral,
Roma nib'eb'yoj yan
rik'in taq ral,
roma yeb'arumutzej yan
ri taq ral.

Ütz xtikina'
ri oqoton ch'omoch'i'y.
Ütz xtikina'
ri k'otoj rikolöb' ulew.
Ütz xtikina'
ri tukuj taq chikapi'.
Ütz xtikina'
ri oqoton tz'i'.

Xeb'os ri taq ral.
Xeb'os k'a
ri salkoköx,
xeb'os k'a
ri la'x lo'x.
xeb'os k'a
ri q'eq q'eq.
xeb'os k'a
ri köq köq.

RUXAQ WUJ

☉ / ☿ (20 - 21)

RETAL ETAMANİK

Xril ri ak'wal
rejqalen ri tzijonik
xusik'ij, xretamaj
nukanuj ruxe'el ri
tzijonik.

RUB'EYAL TIJONİK

Tab'ij chi ke ri ak'wala' re jun ilon tzij re':
Jun nimaläj, utziläj ixöq;
yalan nikikot taq yojaläx yan,
yojruch'elej yojrejqaq taq öj ak'wala',
yojriliq, nuch'äj qatzyaq taq öj koköj.
Yojnimär, yojrijix: rija' jantape' yojrajo'.

RI QATE'.

Tikitiz'ib'aj jun chik rije', tikisik'ij chi kiwäch konojel ri
kachib'il ri xkib'an.

Tikinuku' tikib'ij chi kijujunal ri xub'ij ri kite' chi ke taq
xeyakatäj wakamin, taq xepe pa tijob'äl; rat ronojel
tatz'ib'aj chi ruwäch ri tz'alem tz'ib'ab'äl. K'a ri' tikisik'ij
rije'.

Tab'ij chi ke chi yalan k'atzinel chi niqanataj jantape'
ronojel ri utziläj taq tzij yekib'ij ri qate' chi qe; chi ri
ruxe'el ronojel re tzij re', ja ri: tiqab'ana' jantape' ri üt,
richin yojok utziläj taq winaqi'.

Tutzijoj jun ak'wal achike ruchajixik nub'an jun t'üq chi

ke ri rusaqmolo' taq nipache', jun chik tutzijoj achike
kilixik nub'an chi ke ri xtaq ral taq ye'aläx. K'a ri'
tikak'axaj ri tzijonik rub'ini'an: "Ri t'üq nikikot".

Tikijaqa' konojel ri ak'wala' pa juk'al rajlab'al ruxaq wuj,
konojel tikisik'ij ka'i' mul eqal eqal ri tzijonik, pa taq
kiyonil keq'ax ri ak'wala' chi kiwäch ri kachib'il richin
nikisik'ij ri tzijonik, achike ri nikajo'.

Tak'utuj chi ke ri ak'wala' re jujun k'utunik re':

¿Achike kami rejqalen re jun tzijonik re'?
Chi janipe' ri k'o qak'aslen yojaläx.
Chi k'atzinel chi niqato' ri qate' rik'in
kichajixik, kilixik ri xtaq qachaq'.
Chi ...

¿Achike kami ruxe'el re tzijonik re'?
Chi ri t'üq yalan nikikot roma rija' e k'o ral, roma
rija' te'ej.
Chi xe'aläx ri xtaq ral ri t'üq.
Chi yerilij ri xtaq ral ri t'üq.

Tub'ij ri ak'wal achike ruxe'el re tziyonik re'.

Tikisik'ij jun b'ey chik ronojel ri tziyonik, k'a ri' tikijuxu' re tziy re', ri e k'o chupan ri pach'un tziy.

salkoköx
lo'x lo'x

q'eq q'eq
käq käq

K'a ri' tikiya' kaq'omal ri xtaq ral äk' chuqa' ri kite' äk' achi'el ketzu'un, achi'el kij nub'ij ri tziyonik. Jeb'el tikib'ij tikikamuluj kib'i' ri aq'omab'al yekikusaj.

RURAYB'ÄL TIJONĪK

Jeb'el tiretamaj
ri ak'wal nub'ij
achike kib'anikil,
achike kib'onil ri
yerutz'et ri
yerak'axaj.



RETAL ETAMANĪK

Jeb'el nub'ij ri
ak'wal achike
kib'anikil, achike
kib'onil ri yerutz'et,
ri yerak'axaj.

RUXAQ WUJ

.. / ... (22 - 23)

RUB'EYAL TIJONĪK

Tatzijojchi ke ri ak'wala' achike xab'ijchi ke ri awachib'il
taq xab'e'apon nab'ey q'ij pa tijob'äl.

Tab'ij chuqa' re jun xti tzijonik re' chi ke:
Taq xib'e'apon ri nab'ey q'ij pa tijob'äl, xb'epa'e'
jun xti ala' wik'in, ke re' xub'ij chi we: tijonel;
y'in Carlos nub'i', wuqu' nujuna', in petenäq
B'oko', ri nata' nisamäj wawe', y'in xkinok
atijoxel, ri wachoch k'o wawe' naqaj chi re ri
tijob'äl ...

Taq xinchöp ri tijonik, xink'utuj kib'i' ri nutijoxela', jun
xti xtän xuchöp oq'ej, man jun xtikir xub'ij ...

Wakamin, tikitizijoj rije' achike xkik'ulwachij ri nab'ey
q'ij xeb'e'apon pa tijob'äl, tikib'ij achike xkib'än chuqa'
achike roma ke ri' xkib'än. Ke'awak'axaj, tab'ijchi ke, chi
e k'o ak'wala' yalan nikixib'ij ki' ri nab'ey q'ij yeb'e pa
tijob'äl, k'iy choq'oma ri nikixib'ij ki'; xa xe k'a yalan
k'atzinel chi jeb'el niqetamaj yojch'o'n, niqatz'et ruwa
wuj, yojtz'ib'an roma ri' öj k'o pa tijob'äl.

Tasik'ij chi kiwäch ri tzijonik rub'ini'an: "Ri ti palamax".
Taq xtab'än ri sik'inik man nab'ij ta ri ch'ab'äl palamax

richin natz'et wi ri ak'wala' niq'ax chi kiwäch chi ri
tzijonik nich'o'n chi rij jun palamax.

Wi xtikil chi ri tzijonik nich'o'n chi rij jun palamax,
tak'utuj chi ke achike roma xq'ax chi kiwäch, ke'awak'axaj
konojel ri nikajo' yech'o'n. Wi man xtikil ta, ke'ato' jub'a'.

K'a ri', tasik'ij jun b'ey chik chi kiwäch ronojel ri tzijonik.
Wi k'o jun chi ke rije' nirajo' nusik'ij ruyonil, tub'ana'.

Tab'ana' re jujun k'utunik re' chi ke:

¿Achike ri nich'o'n chupan ri tzijonik?
Nich'o'n ri palamax.

¿Nitikir k'a nich'o'n jun palamax?
**Manäq, xa chöj ri tz'ib'anel xnojün ke ri'
xub'än chi re, ...**

¿Achike roma ri palamax nitikir nixule' nijote'
pa taq kaq'iq'?
Roma e k'o ruxik', roma ...

¿Achike roma röj winaqi' man yojtikir ta yojxule' yojote' pa taq kaq'iq'?

Roma ...


Tikitz'ib'aj rutzij jun xti karne'l, tab'ana' chi re chi rija' nich'o'n, rija' nib'in achike rub'anikil, achike titzu'un, achike nik'atzin wi. Wi man nikirayij ta yetz'ib'an chi rij jun xti karne'l, tikikanuj rije' jun chik xti chiköp.

Tikisik'ij chi kiwäch ri kachib'il ri xkitz'ib'aj, wi xtikil rub'i' ri chiköp ützt k'a kib'anun chi re ri kisamajri'; wi man xtikil ta ri rub'i' k'atzinel chi nito'ox koma ri rachib'il. Tato' rat wi k'atzinel.

Tiqaq'omajri achib'äl e k'ochiruwäch ri kiwuj. Tikik'wa'j lajuj palamax pa tijob'äl jay chi kijujunal ri ak'wala' richin yekajlaj, chuqa' richin nikiweq ri kitijob'äl.

RURAYB'ÄL TIJONÏK

Tiretamaj ri
ak'wal achike
roma
yek'ulwachitäj
jujun tzij,
tiretamaj nuk'is
jun tzijonik.



RUXAQ WUJ

.... / — (24 - 25)

RUB'EYAL TIJONÏK

Tikib'ijrub'i'jun chiköpchi kijuunal ri ak'wala',
rat ke'atz'ib'aj pa taq molaj ri e nima'q, ri e
loman, ri e ch'uti'n.

nima'q	loman	ch'uti'n
tix	tz'i'	sanik
köj	syam	öm
b'alam	äk'	xi'l
kej	patix	amolo'
masat	qolqöl	üs
wakx	umül	jut

¿Achike nik'atzin wi ri kej chi qe röj winaqi'?

Nik'atzin richin:

nireraj qasi'

nireraj qajal

nireraj ichaj

nireraj q'ös

yaruk'wä'j chi rij

¿Achike chi ke ri loman taq chikopi' yalan
nik'atzin chi qe röj winaqi'?

Ri yalan nik'atzin chi qe röj, ja ri tz'i'.

¿Achike nik'atzin wi ri tz'i' chi qe röj winaqi'?

Nik'atzin richin:

nuchajij qachoch

yojruchajij röj taq yojb'e pa juyu'

yeruchajij ri xtaq qawäj

...

¿Achike chi ke ri ch'uti'n taq chikopi' yalan
yek'atzin chi qe röj winaqi'?

Achike na ...

¿Achike chi ke ri ch'uti'n taq chikopi' itz'eton rix
chi yalan nisamäj?

Ri yalan nisamäj ja ri sanik

¿Achike rusamaj nub'än?

Jantape' nireraj ruway.

Jantape' yeruto' rachib'il.

Jantape' nuch'ajch'ojirisaj ri qachoch.

...

Ronojel ri xtikib'ij ri ak'wala', ronojel ütz, xa xe k'atzinel chi nikib'ij achike roma ke ri' nikinojij rije', ke'anaq'atsaj chi rub'ixik ri kinojib'al chi kijujunal.

Tikijaqa' ri kiwuj pa kaji' rukak'al rajlab'al ruxaq wuj, xa xe jeb'el tikitz'eta' ri achib'äl; k'a ri' tikinuku' tikib'ij achoq chi rij xtib'ech'o'n wi re tzijonik re', tikib'ij chuqa' achike roma ke ri' nikib'ij rije'.

Tikisik'ij ka'i' b'ey rub'i' ri tzijonik: "Ri ti nowinäq sanik", wi k'o jun ch'ab'äl man ketaman ta ruq'ajarik tikikanuj chupan ri kisolb'al k'ayew taq tzij. K'a ri' tikisik'ij pa kiyonil ronojel ri tzijonik. Ütz tab'ij re jujun k'utunik re' chi ke ri ak'wala':

¿Achike kib'i' ri ka'i' xtaq chiköp achoq chi rij nich'o'n wi re tzijonik?

Ri jun sanik rub'i'; ri jun xi'l rub'i'.

¿Achike xub'än ri xti xi'l pa jöb'?

Xb'ixan ri xti xi'l.

¿Achike xub'än ri xti sanik pa jöb'?

Xsamäj, xuyäk kan ruway ri xti sanik.

¿Achike xub'än ri xi'l pa saq'ij?

Ri xti xi'l xukanuj ruway, man xril ta ruway.

¿Achike xub'än ri xti sanik pa saq'ij?

Jeb'el xwa' roma xuyäk kan ruway.

¿Achike chi ke re ka'i' xtaq chikopi' ütz xub'än?
Ri ...

¿Achike roma?

Roma

¿Achike chöj b'anob'äl niqajo' niqab'än röj?
Rub'anob'al ri ...

¿Achike roma?

Roma ...

¿Achike roma nib'ix nowinäq chi re ri xti sanik?
Roma kan achi'el nich'ob'on ta, achi'el ninojin ta, achi'el jun winäq.

Tikisik'ij ri ruk'isib'äl molaj ch'ab'äl, akuchi' nik'is wi ri tzijonik:

"Ri xti xi'l xuk'utuj jub'a' ruway chi re ri ti sanik, ri ti sanik xub'ij chi re:

Wakamin rat kab'ixan, rokik yin yiwa'.


K'atzinel chi ri ak'wala' nikinojij jun chik rub'eyal nib'ek'is ri tzijonik, achi'el re':

Ri xti sanik xutz'et chi ri xti xi'l nikom yan chi re wayjal; xusipaj jub'a' xti ruway; xub'ij chi re chi tiretamaj chi yalan k'atzinel numöl nuyäk ruwäy; ke ri' man jun b'ey xtuk'owisaj ta wayjal.

Tikitz'ib'aj ri ak'wala' janipe' ri xkinojij, k'a ri' tikisik'ij chi kiwäch ri kachib'il.

RURAYB'ÄL TIJONĪK

Tiretamaj ri ak'wal
nutzijo jun tzi,
chuqa' nunojij jun
tziyonik.



RUXAQ WUJ

— / — (26 - 29)

RETAL ETAMANĪK

Xutzijo ri ak'wal
jun tzi, chuqa'
xunojij jun tziyonik.

RUB'EYAL TIJONĪK

Tikib'ij ri ak'wala' achike je' tinamit akuchi' e b'enäq wi;
tatz'ib'aj ronojel ri xtikib'ij;

Xelaju'
Iximche'
Panq'an
B'oko'
Pa Su'm

...

Tikitizijo achike ketaman chi rij re jujun tinamit re':

Achi'el ri tinamit k'o kib'i' ke chuqa' ri' k'o kib'i' ri
chikopi', ri kumatz chuqa' k'o kib'i'.

Tikib'ij kib'i' jujun kumatz:

tolob'on

oto'y

...

Tikitizijo wi k'o jun tziyonik kak'axan chi kij ri kumatz, wi
nikixib'ij ki' chi kiwach, wi kitz'eton jun kumatz. Rat
tatzijo re jun tziyonik re' chi kiwach: "Ri Kumatz rik'in ri
xokoq'a", tz'ib'an pa waqi' rukak'al (26) rajlab'al ruxaq

wuj, xa chöj tatzijo; k'a ri' tatz'ib'aj re jujun molaj ch'ab'al
re' richin niketamaj nikitizijo nikitiz'ib'aj jun tziyonik.

"Ri kumatz rik'in ri xokoq'a"

Pa tinamit Pa Su'm ojer kan nikitizijo chi ri
xokoq'a xa jun kumatz.

Jun b'ey kan wuqu' alab'o' yemuxan pa jun
rimirik ya'.

K'ate' xb'e'el pe jun nimalaj kumatz xok el
jun xokoq'a'.

Ri alab'o' xe'anima'j el chupan ri ya', k'a ri'
xkinimaj ri tzi pa ruwi' ri xokoq'a'.

Tikinojij ri ak'wala' jun tziyonik, tikitizijo jun ri b'in chik
chi kiwach, wi man yetikir ta nikinojij utz tikinataj "Ri ti
nowinaq sanik"; tikib'ana' pa kaji' molaj ch'ab'al chi re
achi'el xab'an chi re ri tziyonik "Ri kumatz rik'in ri
xokoq'a". Rat, tatz'ib'aj ri kaji' molaj chuqa' tatz'ib'aj
rub'i' ri tziyonik.

Tikijaqa' ri kiwuj, tikitz'eta' ri ruwa wuj pa kiyonil.
Tikib'ana' jun jux chi kixe' konojel re ch'ab'al re': "Chuqa'
man ütz ta nak'üt rik'in ri aq'a' roma nikotoko' ri ruwi' aq'a'
xak'utb'ej wi", k'a ri' tikisik'ij ka'i' mul.

Tab'ij re jujun k'utunik re' chi ke:
¿Achike rub'i' ri tzijonik xitz'et qa?
Ri kumätz rik'in ri xokoq'a'.

¿Achike chik jun rub'i' ri xokoq'a' iwak'axan?
Kotosera, ...

¿Achike chik jun tzij iwak'axan pa ruwi' ri
xokoq'a'?
Man jun ...

¿Kan qitzij k'a nikotoko' ruwi' qaq'a' wi niqak'üt
ri XOKOQ'A'?
Achike na ...

Ke'awak'axaj na konojel ri ak'wala', k'ari' tab'ij chi ke chi
ri qati't qamama' ja re' xkib'ij, xa xe richin xkik'üt chi
qawäch chi: "YALAN K'ATZINEL YOJNIMAN TZIJ.
CHI MAN ÜTZ TA YOJK'UTUN CHI RE RUWI'
QAQ'A'".

¿Achike winaqi' k'atzinel chi niqanimaj kitzij?
Konojel ri e nima'q chi qawäch röj:
qati't qamama'
qate' qatata'
qanimal
qach'itite' qach'ititata'

qatijonel
q'atb'äl taq tzij

...

¿Achike ri man ütz ta yeqak'üt rik'in ruwi'
qaq'a'?

Ronojel ruwäch:

winaqi'

chikopi'

q'ayis

mololen

konojel ri e k'o chi kaj

konojel ri e k'o chi ruwach'ulew

Tikitz'eta' tikisik'ij ka'i' b'ey ronojel ri tzijonik pa kiyonil
ri ak'wala'.

Tikitzijoj janipe' ri xq'ax chi kiwäch, janipe' ri xk'oje' kan
pa kiwi'. Rat jeb'el ke'awak'axaj.

Tikaq'omaj ri kumätz achi'el raq'omal ri XOKOQ'A' k'o
chi rij ri wuj. Ke'ato' chi rub'ixik kib'i' ri jujun raq'omal:

käq

kaqköj

q'än

räx

xar

...

Tikik'utuj ri ak'wala' pa taq kachoch, kik'in kach'alal wi
ke re' kib'i' ri raq'omal ri Xokoq'a'. Tatz'ib'aj ri man junan
ta rub'ixik. Tikik'utuj ri kib'i' ri ka'i' chik raq'omal ri
xokoq'a'.

RURAYB'ÄL TIJONĪK

Tiretamaj ri ak'wal
nunojij rub'i' jun
tzijonĭk, tiretamaj
nuk'än runa'oj chi
rij jun tzijonĭk.



RETAL ETAMANĪK

Xunojij ri ak'wal
rub'i' re tzijonĭk re',
xretamaj xuk'än
runa'oj chi rij ri
tzijonĭk.

RUXAQ WUJ

≡ / ≡ (30 - 35)

RUB'EYAL TIJONĪK

Tasik'ij rat tijonel ka'i' mul chi kiwäch ri ak'wala' ronojel
ri tzijonĭk, man tasik'ij rub'i' ri tzijonĭk. Wi e k'o jujun
k'ayew taq tzij yekil, kekikanuj chupan ri kisolb'al k'ayew
taq tzij richin niketamaj ri kiq'ajarik; ke'asolo' jub'a' chik
chi kiwäch wi k'atzinel.

Tab'ij chi ke ri ak'wala' chi k'atzinel nikinojij rub'i' ri
tzijonĭk; ke'awak'axaj, tatz'ib'aj chi ruwäch ri tz'alem
tz'ib'ab'äl ronojel ri xtikinojij.

Tasik'ij jun b'ey chik chi kiwäch ronojel ri tzijonĭk,
tikicha' rije' ri rub'i' chupan ronojel ri xkinojij. Tab'ij chi
ke ri rub'i' tz'ib'an chi ruwäch ri wuj.

Tikijaqa' ri kiwuj, tikitz'eta' ri achib'äl k'o chi ruwäch ri
lajuj rukak'al rajlab'al ruxaq wuj, tikib'ij kib'i' konojel ri
achib'äl yerutz'et; tikib'ij achike nub'än ri achin, tikib'ij
wi ützt b'anob'äl ri najin chi rub'anik, xa ma ützt ta nub'än
ri achin. Tikib'ij chuqa' achike roma ke.ri' nikib'ij.

Wi man junan ta kinojib'al ri ak'wala' pa ruwi' ri achib'äl,
jeb'el tasolo' chi kiwäch ri na'oj nub'än ri achin. Ütz
chuqa' tikik'utuj chi ke kite' kitata', kati't kimama' achike
nikib'ij rije' chi rij ri b'anob'äl nub'än ri achin.

Tikijaqa' ri kiwuj pa ka'i' rukak'al rajlab'al ruxaq wuj,
tikajlaj janipe' awän e k'o, janipe' äj e k'o, janipe' al e k'o.
Jumul tiketamaj rutz'ibaxik ri maya ajlab'äl, tikitz'ib'aj
kajlab'al ri jujun achib'äl.

awän	äj	al
jun	jun	jun
ka'i'	ka'i'	ka'i'
oxi'	oxi'	oxi'
kaji'	kaji'	kaji'
wo'o'	wo'o'	wo'o'
waqi'	waqi'	waqi'
wuqu'	wuqu'	wuqu'
waqxaqi'	waqxaqi'	waqxaqi'
b'eleje'	b'eleje'	b'eleje'
lajuj	lajuj	lajuj
	julajuj	julajuj
	kab'lajuj	kab'lajuj
	oxlajuj	oxlajuj
	kajlajuj	kajlajuj
		wolajuj
		waqlajuj



wuqlajuj
waqxaqlajuj
b'elejlajuj
juk'al
jun rukak'al
ka'i' rukak'al
oxi' rukak'al
kaji' rukak'al
wo'o' rukak'al

Tikit'z'aqatsaj re jujun molaj ch'ab'äl re'. Tikikanuj chi ruwäch ri kiwuj ri ch'ab'äl xketz'aqatsan.

Konojel ri achi'a' k'ochi niketamaj ... _____

Konojel ri achi'a' ketaman yematyoxin chi re ri ... _____

Taq yalan jeb'eljöb' ... _____

Taq ek'iy al yeb'epa ... _____

Taq yeq'ajan ri ... _____

Ri alab'o' yexuke' taq ... _____

Nikitün ri kiq'a' richin ... _____

Chuqa' nikesaj ri kipawi' taq yech'o'n rik'in jun ... _____

_____ jun ... _____

Xaxperi ... _____

Xaxperi ... _____

Xaxperi ... _____

Roma ri achin wakamin man nitzi jon ta chik rik'in ri ... _____

Taq xkitz'aqatsaj yan re jujun molaj ch'ab'äl re', jeb'el tasolo' chi kiwäch re jujun na'oj xkitz'aqatsaj, ke'asolo' ri k'ayew taq ch'ab'äl.


Wi k'o jun ak'wal nirajo' nusik'ij ronojel ri tzi jonik chi kiwäch ri rachib'il, tub'ana'; wi k'o jun ak'wal nirajo' chöj nutzi jon, tub'ana'.

Ütz yekaq'omaj ri achib'äl e k'o chi ruwäch ri wuj, chuqa' kekib'ij kib'i' ri jujun achib'äl.

Tib'ekitzi jon ri ak'wala' chi ke kite' kitata', kichaq' kinimal re tzi jonik re'.

RURAYB'ÄL TIJONĪK

Tiretamaj ri
ak'wal achike
yek'atzin wi ri
jujun retal
tz'ib'anĭk yerĭ
chupan jun
tzijonĭk, tiretamaj
nub'än
ruwachib'äl ri
nub'ij ri tzijonĭk.



RUXAQ WUJ

≡ / " (36 - 41)

RUB'EYAL TIJONĪK

Tikijaqa' ri ak'wala' ri kiwuj, tikitz'eta' ri rub'i' ri tzijonĭk, tikinik'oj ronojel ri achib'äl e b'anun.
Tikinuku', tikib'ij achoq chi rij kami xtib'ech'o'n wi re tzijonĭk re'. Rat, ke'awak'axaj; tab'ij chi ke chi ronojel ri xkib'ij yalan üt, xa xe k'a k'atzinel chi niqasik'ij ronojel ri tzijonĭk richin niqetamaj achike nub'ij re tzijonĭk re'.

Tikitz'eta' rije' ri ruwa wuj, tikisik'ij pa kiyonil, rat kow tasik'ij chi kiwäch ri tzijonĭk.

Tikib'ana' jun jux chi kixe' ri ch'ab'äl man ketaman ta kiq'ajarik.

"Taq xe'anımäj ri wuch' rik'in ri saqb'in."

Jun b'ey kan ...

Tikitz'eta' chi e k'o k'iy retal ri tz'ib'anĭk chupan re tzijonĭk re', tiketamaj achike yek'atzin wi:

Re' (.) nik'atzin richin yatuxlan jun xti ko'öl ramaj.

Re' (;) nik'atzin richin yatuxlan jun xti loman ramaj.

Re' (.) nik'atzin richin yatuxlan jun xti nim ramaj, nuq'alajirisaj chi xk'is rub'ixik jun tzij richin nichap chik el jun.

Re' (" ") retal chi ri tz'ib'an chi kikojöl kan ja ri' xb'itäj.

Re' (j !) retal chi ri tz'ib'an chi kikojöl nuq'alajirisaj kikoten, b'is, xib'iri'l, jun tzij kan k'atzinel chi nab'än.

Re' (¿ ?) retal ri tz'ib'an chi kikojöl xa jun k'utunĭk.

Re' (—) retal chi jun tzijonĭk chi kiwäch jun ka'i, oxi'winaqi', chikopi', achike nari yetzijon.

Takanuj chupan tzijonĭk akuchi' e k'o wi chi kijujunal ri retal tz'ib'anĭk, tasik'ij chi kiwäch ri ak'wala', tikisik'ij rije'; k'a ri' tak'utuj chi ke wi jeb'el xq'ax chi kiwäch, wi jeb'el xb'e'apon pa kiwi' ri yek'atzin wi ri jujun retal tz'ib'anĭk.

RETAL ETAMANĪK

Xretamaj ri ak'wal
achike yek'atzin
wi ri retal tz'ib'anĭk
xretamaj xub'än
ruwachib'äl ri
nub'ij ri tzijonĭk.

Tasik'ij jun b'ey chik chi kiwach ri ak'wala' ronojel ri
tzijonik richin nikicha' rije' achike ch'oj achib'al xtikib'an:
jun ak'wal nub'an rub'anob'al ri wuch', jun chik rub'anob'al
ri saqb'in, jun chik rub'anob'al ri utiw. Ke'ato' chi rub'ixik
ri xtikib'ij, chi rub'anik ri xtikib'an.

Jun chik molaj ak'wala' tikib'ana' kiwachib'al ri oxi'
chikopi'. Wi e k'o jujun chik molaj nikajo' nikib'an,
tikib'ana'.

Tab'ij re jujun k'utunik re' chi ke ri ak'wala':

¿Achike kib'i' ri oxi' xtaq chikopi' yetzijox
chupan re tzijonik re'?

Ri kib'i' ri oxi' xtaq chikopi' ja re':
wuch'
saqb'in
utiw.

¿Achike ri utz kin'aoj xkib'an?
Ri ...

¿Achike roma?
Roma ...

¿Achike ri man utz ta runa'oj xub'an?
Ja ri ...

¿Achike roma?
Roma ...

¿Achike oyowal e qatz'eton röj pa tijob'al?
Ja ri ...

¿Qetaman xqajech'uj qi' chi kiwach?
Ja' qetaman ..

¿Achike xqab'an?
Xoj ...

Jeb'el ke'awak'axaj konojel ri ak'wala', ticha' jun utzilaj
b'anob'al richin nikib'an konojel ri ak'wala' pa tijob'al.

Tib'ekitzijoj ri ak'wala' chi ke kite' kitata', kichaq' kinimal
re tzijonik re'.

RURAYB'ÄL TIJONĪK

Tiretamaj ri ak'wal
kerukusaj ri k'ayew
taq tzij e k'o chi
ruwäch ri wuj,
tiretamaj chuqa'
achike rub'ixik nib'ix
pa rutinamit, pa juley
chik tinamit.

42

Kisolb'al k'ayew taq tzij

al. Ri al, jun ajxik' chiköp achi'el jun ajch'ak (xik)
rub'anikil. Pa taq ik' ab'rill yeb'e pa ruqajb'äl
q'ij richin niklädq ri jöb'. Pa taq novembre
yetzolin pa releb'äl q'ij richin nikitz'apil ri jöb'.

antun ch'ök, ajtun ch'ök. Antun ch'ök rub'il' ri
achilj ch'ök q'eq ilj.

-b'a'en. Ri tz'il nib'a'en chi kil ri ök'.

b'onil ilj, rutzub'äl. "¿Achike rub'onil ri awök'
nána?". "Q'eq rub'onil (q'eq ilj)".

ch'ab'. Ch'ab' nib'ix chi re jun kotoklik che', ri
k'o jun k'an pa taq rutz'a'n, richin nuk'äq ri
ralch'ab'.

kaqkölj. Kaqkölj nib'ix chi re ri b'onil man kan ta
käq, xa chaj jub'a'.

-purilj, -b'a', -k'apilj. Nupurilj, nib'ix chi re taq ri
eyaj nok pa ti'ilj. Ri tz'il xupurilj raqän ri ak'wal.

qo'ch. Ri qo'ch jun chiköp ri nuya' ruk'u'x ri
loq'oläj ixim. Jun qo'ch, achi'el jun antun

RETAL ETAMANĪK

Yerukusaj ri ak'wal
ri k'ayew taq tzij,
chuqa' ri kib'ixik pa
rutinamit, pa juley
chik tinamit.

RUXAJ WUJ

.. / ... (42 - 43)

RUB'EYAL TIJONĪK

Tikijaja' ri kiwuj, tikinik'oj ronojel ri tz'ib'an chi ri'.

Ke'asolo' kij re k'ayew taq tzij re' chi kiwäch ri ak'wla', ri
e k'o pa ruk'isib'äl ruxaq wuj.

Tikik'utuj chi ke ri kite' kitata' wi ke re' rub'ixik pa
kitinamit, achike kib'ixik pa jun chik tinamit.

Chi ruwäch kitz'ib'ab'äl wuj tikitzib'aj ri ch'ab'äl junan
kiq'ajarik ri xtib'ix chi ke.

Tab'ana' chi ri ak'wal kerukusaj ri k'ayew taq tzij taq
nitzijon.

Ronojel q'ij tukanuj jun k'ayew tzij chupan ri ruwuj, k'a
ri' tukanuj ruq'ajarik chupan ri kisolb'al k'ayew taq tzij.

Tikitz'ib'aj jun xti ko'öl tzijonik richin yekikusaj ri k'ayew
taq tzij e tz'ib'an wawe'.

Wi e k'o jujun ak'wala' man jani yetikür ta yekikusaj ri
k'ayew taq tzij, ke'ato'.

Jeb'el kekak'axaj kati't kimama', kite' kitata' richin
nikitz'ib'aj lajuj k'ayew taq tzij chi ruwäch jun wuj.

RURAYB'ÄL TIJONĪK

Tiretamaj ri
ak'wal achike
nik'atzin wi ri
"Rucholajen re
taq tzij".

Rucholajen re taq tzij	
Ri ti b'kanel x'i	5
Ri loq'ak' che'	6
Ri q'ij ak'ule'	8
Taq il xar xreleq'aj rupawil' il antun ch'ök	11
Ri k'asanel mama'	12
Ri ti samajel sonik	14
Ri samajel autz'	16
Ri chikopi'	18
Ri i'äq nikilof	20
Ri ti palomax	22
Ri ti nowinäq sonik	24
Ri kumäts rik'in ri xakaq'a'	26
Taq yeq'ax ri al	31
Taq xe'animäq ri wuch' rik'in ri saqib'in	36
Ksalo' al k'ayew taq tzij	42

RUXAJ WUJ
... 44

RUB'EYAL TIJONĪK

Tikijaqa' ri kiwuj, tab'ij chi ke chi ri "Rucholajen re taq wuj" k'atzinel richin chanin nawil jun tzijonik.

Tikisik'ij ronojel ri tz'ib'an wawe', chuqa' tikib'ij rajlab'al ri ruxaq wuj akuchi' e k'o wi re jujun tzijonik, tikib'ij pa qach'ab'al.

Kekikanuj ri tzijonik chupan ri kiwuj, pa ruxaq wuj akuchi' nub'ij wi ri ajlab'al.

RETAL ETAMANĪK

Xretamaj ri ak'wal
achike nik'atzin wi
ri "Rucholajen ri
taq tzij".

Tikikanuj ri tzijonik ri yalan xqa chi kiwäch, tikisik'ij pa kiyonil; k'a ri' tikitz'ib'aj jun ka'i' tzij pa ruwi', xa xe ri nikinataj chuqa' tikib'ana' ri achib'al e b'anun chi ri', chi ruwäch jun ruxaq wuj.

Wi k'atzinel; ke'ato'rat, tikito'ki'rije' chi kiwäch konojel.

RUCHOLBA'L WUJ

Rajlab'al
ruxaq wuj.

RUTZIJOB'AL WUJ ●●●

RI XOKOQ'A' RUSAMAJIB'AL TIJONEL

Rij ri wuj ●●●●

Ruxaq wuj • (1) —●

Ruxaq wuj •• (2) —●●●

Ruxaq wuj ●●● (3) —●●●●

Ri ti b'ixanel xi'l —●

Ri loq'olāj che' —●●●

Ri q'ij xk'ule' ———

Taq ri xar xreleq'aj rupawi' ri antun ch'ök ———●●

Ri k'asonel mama' ———●●●

Ri ti samajel san'ik ●

Ri samajel sutz' ●●●

Ri chikopi' ●●●●

Ri t'üq nikikot —

Ri ti palamax —●●

Ri ti nowināq san'ik —●●●

Ri kumätz rik'in ri xokoq'a' ———●

Taq yeq'ax ri al ———●●

Taq xe'animāj ri wuch' rik'in ri saqb'in ———●

Kisolb'al k'ayew taq tzij ———●●

Rucholajen re taq tzij ———●●●



